




Langa uhamba ngetinyawo uya esikolweni. Uphume ngeluvivi ekhaya.

Ekhaya kubo kukhashane nasesikolweni.

Ujabule mbamba ngekubuyela esikolweni, ngobe sekuphele tinyanga ticolwa tavalwa.



Njengobe ahamba, ufike eme ekhoboMandla. Sesidze lesikhatsi Langa angamboni umngani wakhe. Bebangakavunyelwa kuyodlala.

Labafana labagcwele intfokoto bavuselana ngetinyawo nangemikhono.





Labafana bachubeka nendlela, sebajake kuyofika esikolweni.

Balangatelela kucoxa nge-*lockdown*.

“Yini leniyentile kute nitivikele kuleligciwane?” kubuta Langa.




“Besivuka ekuseni sigeze tandla. Besiphindze sitigeze nakufika sikhatsi sekudla,” kuphendvula Mandla.

“Vele, kufanele sihlale sitigeza!” kuvuma Langa.

“Futsi kufanele sihlale siyewukhelela emanti,” angeta.





“Bengivame kutihlalela nebangani bami, kepha nyalo angisakhoni ngobe akukafaneli sihlale nebantfu labanyenti,” kusho Mandla.

“Minyenti nalemitsetfo lemisha,” kubalisa Langa.



“Kumelwe uvale imphumulo nemlomo nawuya ngephandle. Nawukhwehlela, kufanele ukhwehlelele engcoseni yakho. Nawucedza kukhwehlela kumelwe ugeze tandla,” kubala Langa.





“Endzaweni lengihlala kuyo asisakhoni nekudlala ibhola,”  
kusho Mandla.

“Lapho lengihlala khona, bantfu labadzala abasakhoni  
kulandza imitsi yabo emfolamphilo,” kusho Langa.



“Lolubhubhane kanye ne-lockdown kuwhlukumete mbamba umphakatsi wakitsi,” kusho Langa.

“Asisakwati ngisho nekuya edolobheni, phela ematekisi asayekele kusebenta,” kusho Mandla.





“Bantfu labanyenti labatsengisako sebadvonsa matima ngobe abasakhoni kutsengisa,” kuchubeka Mandla.

Sebabindzile nyalo labafana. Njengobe sebasondzela ngasesikolweni, sebacala kushakutela.



Langa utsi, “Kuze ngihlale ngimatasatasa, bengiwasha futsi bengisita ngekupheka. Bengiphindze ngibukele ithelevishini futsi bengitadisha.”

“Mine, bengitidlalela ibhola. Ngisite Make, ngiphindze ngitifundzele tincwadzi,” kusho Mandla. Labafana befika esikolweni ngesikhatsi.





## —Imibuto

1. Yini loyentile kute utivikele egciwaneni le-*Corona*? Chaza.
2. Ekhasini 10, labafana basebentisa inkhulumo lesesikhatsini lesengcile. Bhala emavi abo usebentisa inkhulumo yesikhatsi sanyalo.
3. Bhala emavi abo usebentisa inkhulumo lesesikhatsini lesitako.



---

Lencwadzi yetindzaba isekelwe embikweni wesiteshi semsakato lokutsiwa yi-RX. I-RX Radio siteshi semsakato sebantfwana lesiku-intanethi, lesisungulwe saphindze sakhelwa bantfwana.

I-RX Radio isakatela e-Red Cross War Memorial Children's Hospital eKapa.

I-RX Radio isita bantfwana bacoce ngetintfo letibalulekile kubo.

Vakashela i-RX Radio